

Սասուն Մ. Հարությունյան

ԱՌԱՋԻՆ ՏՊԱՐԱՆԻ ԵՎ ԹՂԹԻ ԳՈՐԾԱՐԱՆԻ ՀԻՄՆՈՒՄԸ ՀԱՅԱՍՏԱՆՈՒՄ

Հայկական տպագրության 500 - ամյակի առթիվ*

Մուտք

Մարդկության պատմության ընթացքում կատարված կարևորագույն հայտնագործություններից մեկը տպագրության գյուտն է, որը հեղաշրջում առաջացրեց քաղաքակրթության զարգացման մեջ:

Տպագրության արվեստն աննկատ չմնաց նաև հայ ժողովրդի կողմից, ուստի գուտենբերգյան գյուտից կարճ ժամանակ անց Վենետիկում և ապա Եվրոպայի հայկական այլ գաղթօջախներում տպագրվեցին առաջին հայատառ գրքերը, ստեղծվեցին հայալեզու տպարաններ: Սակայն Հայաստանում առկա քաղաքական ու սոցիալ-տնտեսական ծանր պայմանները սկզբում հնարավորություն չէին տալիս սեփական երկրում տարածել տպագրությունը: Այդուհանդերձ, տպագրության գյուտից մոտ երեք հարյուր երեսուն տարի հետո՝ 1771 թ. հաջողվում է Հայաստանում ևս ստեղծել առաջին տպարանը:

1. Միմեոն Երևանցու պայքարն Էջմիածնում տպարան հիմնելու համար

Ինչպես իրավացիորեն գրում էր Գ. Չարբհանայանը՝ «Հայկական նուիրապետութեան արոռոյն՝ Էջմիածնի հռչականունն վանաց մէջ առաջին տպարան հաստատողն եղաւ Միմեոն կաթողիկոս...»¹: Արձանագրելով այն իրողությունը, որ Միմեոն Երևանցին մեծ դժվարություններ հաղթահարելով է կարողացել հասնել այդ նպատակին, Լեոն հավելում էր. «Այստեղ արդեն լիուլի արտահայտվում է Միմեոն կաթողիկոսի խիզախ, ձեռնարկող ոգին, կամքի ուժը, վառ սերը դեպի կուլտուրական հիմնարկությունները»²:

Կարողալով Միմեոն Երևանցու «Յիշատակարանը»՝ նկատում ենք, որ 1765-ից սկսած կաթողիկոսը նամակագրական կապերի մեջ էր տարբեր մարդկանց հետ՝ տպարանի հիմնադրման հարցերով: Այսինքն՝ կաթողիկոս ընտրվե-

*Յոդվածն ընդունվել է տպագրության 09.03.2012:

1 Գ. Չ. Չարբհանայան, Պատմութիւն հայերէն դպրութեանց, Վենետիկ 1905, էջ 275:

2 Լեո, Հայոց պատմություն, «Երկերի ժողովածու», երկրորդ, գիրք երրորդ, Եր., 1973, էջ 439:

լուց մոտ երկու տարի անց Միմենն Երևանցիին արդեն տպարան ստեղծելու ցանկություն է ունեցել: Նա լավ գիտակցում էր, թե ինչ կարևոր նշանակություն կունենա տպարանի հիմնումը հայրենաբնակ հայության համար:

Միմենն Երևանցիին տպագրական գործին քաջածանոթ էր դեռևս Կ. Պոլսում և Ջմյուռնիայում նվիրակ եղած տարիներին, երբ հասցրել էր ուսումնասիրել այդ քաղաքներում գործող հայկական տպարանների աշխատանքը. «Նախքան կաթողիկոս ընտրվելը,- գրում է Ռ. Իշխանյանը,- Միմենն իբրև Էջմիածնի նվիրակ, ապրել էր Կոստանդնուպոլսում, ծանոթ էր տեղի հայկական գաղութի մշակութային կյանքին, մասնավորապես տպարանների աշխատանքներին: Եղել էր նաև Ջմյուռնիայում, աջակցություն ցույց տվել տեղի հայկական տպարանի աշխատանքին»³:

Ավելին՝ հայրենիքում տպարան ստեղծելու միտքը Միմենն Երևանցու մոտ ծնվել է դեռ Հնդկաստանում, որտեղ նա 1744 թ. մեկնել էր որպես նվիրակ: Հնդկաստանում անցկացրած տարիներին նա ծանոթացել էր մադրասաբնակ հայ մեծահարուստ Գրիգոր Չաքիկյանի (Միքայելյան)⁴ հետ, որը հետագայում մեծ օժանդակություն ցուցաբերեց Հայաստանում տպարան հիմնելու գործին: Դա էր պատճառը, որ կաթողիկոս դառնալուց կարճ ժամանակ անց Միմենն Երևանցիին սկսում է նամակներ ուղարկել տարբեր գաղթօջախներ, որոնցում գործում էին հայկական տպարաններ:

Կաթողիկոսը տեղեկություններ ուներ, որ Ամստերդամում Առաքել Պողոսյան անունով մի հայ տպագրության համար պատրաստված հայերեն տառեր ունի: Սակայն վերջինս համապատասխան մասնագետներ չունենալու պատճառով չէր կարողանում տպարան բացել: Ուստի Միմենն Երևանցիին նամակ է ուղարկում Ջմյուռնիայի առաջնորդ Դուկաս Կարնեցուն, որպեսզի նա ամեն զնով այդ տառատեսակները տեղափոխի Մայր Աթոռ. «Միմենն լուր առաւ թէ Առաքել Պօղոսեան Ջուղայեցի մը Ամստերտամի մէջ Յովհաննէս-Միքայէլ Ֆլայշման (Fleischmann) փորագրիչի ձեռքով հայերէն տառեր պատրաստել տուած է, բայց գտպագրատուն հաստատել ոչ կարէր վասն գործաւորաց պակասութեանց»⁵:

Պատասխան չստանալով Առաքել Ջուղայեցուց, Միմենն Երևանցիին Ջմյուռնիայի առաջնորդ Դուկաս վարդապետի միջոցով այս անգամ էլ փորձում է համոզել Ջմյուռնիայում գործող հայկական տպարանի տիրոջը՝ ակնեցի Մարկոսին, որպեսզի նա համաձայնի իր տպարանը տեղափոխել Հայաստան: Սակայն Մարկոսը պատճառաբանում է, թե պետք է Սաղմոսները տպելու գործը ավարտին հասցնի, նոր միայն կկարողանա տպարանը տեղափոխել Հայաստան: Բայց Միմենն Երևանցիին նորից է հանձնարարում Դուկաս վարդապետին, որպեսզի վերջինս բանակցի Մարկոսի հետ: Կաթողիկոսը պարզաբանում էր, որ եթե Մարկոսը դրամի պատճառով չի ուզում Հայաստան տեղափոխել տպարանը, ապա Դուկաս վարդապետը թող ցանկացած գումար վճարի՝

3 Ռ. Իշխանյան, Դայ գիրքը 1512-1920 թթ., Եր., 1981, էջ 92:

4 Գրիգոր Չաքիկյանը (հայտնի է նաև Միքայելյան և Խոջաջանյան ազգանուններով), մադրասաբնակ հայ մեծահարուստ էր, ով դրամական մեծ օգնություն ցուցաբերեց Մայր Աթոռի տպարանի և թղթի գործարանի կառուցմանը: 1771 թ. Գ. Չաքիկյանը Շահամիր Շահամիրյանի հետ ազգային-ազատագրական գործունեություն է ծավալել «Մադրասյան խմբակ»-ի կազմում փորձելով Ռուսաստանի և Կրաստանի օժանդակությամբ ազատագրել Դայաստանը պարսկական և թուրքական լծից: 5 Մ. արք. Օրմանեան, Ազգապատում, Ա հատոր, մասն Ա., Բ տպագրություն, Պելյուք, 1953, էջ 938:

առաջարկելով, որ Մարկոսը Սաղմոսների տպագրումը կարող է շարունակել Հայաստանում: Սակայն Ղուկասին նորից չի հաջողվում համաձայնության գալ: Կարճ ժամանակ անց Սիմեոն Երևանցին էլ ավելի խիստ մեթոդներով է փորձում կարգավորել հարցը և համոզել Մարկոսին: Բայց դա էլ կաթողիկոսին չի հաջողվում, և նրա ջանքերը մնում են ապարդյուն:

Այս առիթով հայ տպագրության պատմության ուսումնասիրողներից՝ Մ. Հովհաննեսյանը գրում է. «Մարկոս անաստոց իրեն եղած այս հրամանին բայց իր յամառութիւնը անպատիժ չի մնաց, ինչու որ թէև 1759ին Սեկ. Ժամգ., 1761ին Խորհրդատետր եւ 1762ին Եզնիկ մը տպած էր բայց մտադրած Սաղմոսի տպագրութիւնը ի գլուխ չի կրցաւ հանել. եւ այնու հետեւ իր տպարանին խօսքն անգամ չենք լսեր»⁶:

Ա. Ալպոյաճյանը ևս կիսում է այս կարծիքը և շարունակելով Մ. Հովհաննեսյանի միտքը՝ եզրակացնում. «Սակայն անհավանական է ենթադրել, թե անոր կազմակերպության մեջ դեր ունեցած ըլլար «Մահտեսի Մարկոս». վասնզի որևէ հիշատակություն չկա այս մասին»⁷: Ըստ Ա. Ալպոյաճյանի՝ պատճառն այն էր, որ ամենայն հավանականությամբ, երբ Մարկոսը մերժել է կաթողիկոսին, վերջինս Ղուկաս Կարնեցու միջոցով փակել է տվել Չմյուռնիայում նրա հիմնած հայկական տպարանը. «Կկարծվի որ Ղուկաս վրդ. դադրեցուցած է այդ տպարանը օգտվելով պետութենէն պատրիարքներու և առաջնորդներու տրված իրավասութենէն, որով անոնց իրավունք կտրվեր հսկելու տպագրյալ գիրքերու վրա»⁸:

Այսպիսով՝ թե՛ Մ. Հովհաննեսյանը և թե՛ Ա. Ալպոյաճյանը հիմք են ընդունում այն փաստը, որ Մարկոսի տպարանը, որը գործում էր Չմյուռնիայում, փակվել է 1762-1763 թթ.: Դրանից ելնելով՝ նրանք ենթադրում են, որ տպարանի գործունեությունը կարող էր կասեցնել արդեն կաթողիկոս ընտրված Սիմեոն Երևանցին, քանի որ վերջինս Մայր Աթոռում տպարան ստեղծելու համար Էջմիածին էր հրավիրել Մարկոսին և մերժում ստացել:

Բայց երբ հետևում ենք իրադարձությունների ընթացքին, տեսնում ենք, որ կաթողիկոսը տպարանի հիմնադրմանն ուղղված նամակագրական կապը սկսել է միայն 1765 թվականին: Հենց այդ ժամանակ է նա նամակով հանձնարարել Ղուկաս Կարնեցուն՝ բանակցել Մարկոսի հետ, իսկ Չմյուռնիայի տպարանը փակվել է 1765-ից առաջ: Ուստի քիչ հավանական է, որ այդ տպարանը փակված լինի Սիմեոն Երևանցու միջոցով: Այս կարծիքի օգտին են խոսում ևս մի քանի փաստարկներ. **նախ**՝ 1763 թ. Սիմեոն Երևանցին նոր էր ընտրվել կաթողիկոս, որից հետո խնդիրներ էին առաջացել Կ. Պոլսի Հայոց պատրիարքության հետ: Եվ երբ նա հագիվ հասցրել էր հարթել այդ հարցերը, Չենդ Բերիմ խանը պատերազմ էր սկսել Երևանի խանի դեմ: Որպեսզի կաթողիկոսի կյանքին վտանգ չսպառնա, Հուսեին Ալի խանը նրան խորհուրդ էր տվել ժամանակավորապես հաստատվել Ալաշկերտում: Բնականաբար, Սիմեոն Երևանցին այդ ընթացքում չէր կարող մտածել տպարան ստեղծելու մասին, առավել ևս՝ վրեժխնդիր լինել Մարկոսից: **Երկրորդ**՝ ինչպես արդեն ասացինք, Սիմեոն Երևանցին Չմյուռնիայում անցկացրած տարիներին մեծ ավանդ էր ունեցել

6 Մ. Հովհաննեսյան, Զննական պատմութիւն ժմ դարու, Փարիզ, 1901, էջ 10:

7 Ա. Ալպոյաճյան, Չմյուռնիո տպարանները, «Պատմաբանասիրական հանդես», 1964, N 2, էջ 73 (հոդվածը աննշան կրճատումներով տպագրել է բանասեր Մ. Զակոբյանը):

8 Ա. Ալպոյաճյան, Չմյուռնիո տպարանները, էջ 73:

վերը նշված տպարանի ստեղծման գործում: Նա գիտակցում էր, թե այդ տպարանը մեծ դեր կարող է ունենալ արևմտահայության համար, քանզի Չմյուռնիան լցված էր կաթոլիկ միսիոներներով և քիչ էր հաղորդակցվում Մայր Աթոռի հետ: Ուստի Չմյուռնիայում գործող տպարանը մեծ դեր էր խաղում ազգապահպանության առումով: Եւ վերջին ու ամենակարևոր փաստն այն է, որ **Մարկոս տպագրիչը այնուամենայնիվ եկել է Էջմիածին**: Ապացույցը նրա գերեզմանն է, որը գտնվում է Մայր Աթոռի միաբանների ընդհանուր գերեզմանոցում: Մարկոսի տապանաքարը կրում է հետևյալ արձանագրությունը. «Այս է տապան հանգստեան Ակնցի տպագիր ծերունագարդ Մարկոսին, որ եկեալ ի Սուրբ Աթոռս և շինեալ զգործարանն, փոխեցաւ առ Քրիստոս բարի մահուամբ, որում Տէր ողորմեսցի, ի ՌՄԻ. ԹՎԻՆ (1771)»⁹:

Ուստի հիմնավորված է հայ տպագրության պատմության ուսումնասիրողներից՝ Ռ. Իշխանյանի այն պնդումը, որ, այնուամենայնիվ, հետագայում Մարկոս տպագրիչն օգնություն է ցույց տվել Էջմիածնի տպարանի կարգավորմանը. «Վերջապես, Էջմիածին է գալիս Չմյուռնիայից հրավիրված տպագրիչ Մարկոսը, բայց հնուտ վարպետի օգնությունը Էջմիածնի տպարանին կարճատև է լինում. ծերունին շուտով մահանում է»¹⁰:

Իսկ մինչ այդ, հանդիպելով Մարկոսի ցուցաբերած համառությանը՝ Սիմեոն Երևանցին փորձել է կապ հաստատել Կոստանդնուպոլսում բնակություն հաստատած Էջմիածնի նախկին միաբան Սարգիս Սարաֆյանի հետ¹¹: Սարաֆյանն ուներ տպագրության համար փորագրված հայերեն տառեր: Սիմեոն Երևանցին նրան նամակ է ուղարկում՝ փորձելով համոզել, որ այդ տառերը կա՛մ վաճառի, կա՛մ նվիրաբերի Մայր Աթոռին. «Եւ էր ի Պօլիս առ Կեսարեցի Սարգիս վարդապետն զիր տպագրական փորագրեցեալ ի Վենետիկ, յոյժ ազնիւ և քաղցրատես, որով զէֆէմէրտէս զիրքն տպեալ էր և պահեր առ ինքն զգիրն և ոչ տայր ումեք և ոչ ինքն զտպագրատուն բանայր: Վասնորոյ՝ գրեաց առ նա սրբազան Վեհրն գթութք սիրոյ և խնդրեաց տալ զտպագրական գիրն սրբոյ Աթոռոյս, կամ զնով և կամ ՚ի յիշատակ հոգւոյն իւրոյ»¹²:

Կաթողիկոսը մի նամակ էլ ուղարկում է Մովսեսին, որը Մայր Աթոռի ներկայացուցիչն էր Կ. Պոլսում, որպեսզի նա բանակցի Սարգիսի հետ և, որքան հնարավոր է, մատչելի գնով կարողանա զնել նրա տառատեսակները: Սարաֆյանի հետ երկար բանակցելուց հետո Մովսեսին չի հաջողվում համաձայնության գալ, քանի որ Սարգիսը ավելի շատ դրամ էր ուզում, քան կաթողիկոսը նախատեսել էր: Բայց դեռ բանակցությունները չավարտած՝ Սարգիսը այդ տառատեսակները վաճառում է Գևորգ անունով մի դպրի, որը Կոստանդնուպոլսում տպարան է հիմնում:

Այսպիսով, Սիմեոն Երևանցին մոտ վեց տարի նամակներ է հղում տար-

9 Արտակ եպս. Սմբատեանց, Սուրբ Էջմիածնի միաբանության գրական-կրթական գործունեությունը եւ Մայր Աթոռի տպարանը, «Էջմիածին» ամսագիր. 1972, N 2, էջ 51:

10 Ռ. Իշխանյան, Գայ գիրքը 1512-1920 թթ., Եր., 1981, էջ 95:

11 Սարգիս արքեպիսկոպոս Սարաֆյանը սկզբնական շրջանում եղել է Կեսարիոն թեմի առաջնորդը: Գետագայում մեկնում է Եվրոպա՝ Վենետիկ, որտեղ հիմնադրում է գրադարան: Սարաֆյանը տասը տարվա ընթացքում՝ 1742-1752 թթ., հրատարակում է մոտ տասնհինգ անուն գիրք, որոնցից առավել հայտնի է Էֆիմերտեի գուշակությունները: Վենետիկից Սարաֆյանը վերադառնում է Կ. Պոլիս, որտեղ մեղադրվում է կաթոլիկության մեջ և հալածվում:

12 Գ. քահ. Աղանեան, «Ղիւան հայոց պատմութեան», գիրք Գ, Սիմեոն կաթողիկոսի յիշատակարանը, Թիֆլիս, 1894, էջ 551:

բեր անձանց, որոնք կարող էին ցանկության դեպքում օգտակար լինել տպարանի ստեղծմանը: Եվ տեսնելով, որ իր ջանքերն ապարդյուն են անցնում, կաթողիկոսը փորձում է տպարան հիմնել իր ուժերով: Բայց այդ գործընթացը կապված էր մեծ ծախսերի հետ, որը Մայր Աթոռը չուներ և բացի այդ, Սիմեոն Երևանցին խնայողաբար էր վերաբերվում Մայր Աթոռի գումարներին: Երկիրը գտնվում էր ծայրաստիճան քայքայված վիճակում, ինչը լավ էր հասկանում կաթողիկոսը: Եվ որպեսզի կարողանա լուծել նյութական խնդիրը, նա այդ մասին տեղեկացնում է հնդկահայ մեծահարուստ Գ. Չաքիկյանին: Վերջինս նույնպես դիմել էր Սիմեոն Երևանցուն և առաջարկել ինչ-որ բանով օգտակար լինել Մայր Աթոռին: Եվ երբ Սիմեոն Երևանցին կաթողիկոս է ընտրվում, նա հիշեցնում է իր խոստման մասին. «... Սիմեոնի կաթողիկոսությունը շնորհատրելով՝ յիշեցրեց նորան իւր հոգևոր կտակը և խնդրեց չմոռանալ իրագործել այն: Սիմեոնն անյապաղ պատասխանում է թէ ս. Էջմիածնին ամենից աւելի հարկատր են նախ տպարանը...»¹³:

Գ. Չաքիկյանը, իր խոստմանը համաձայն, ուղարկում է որոշ գումար, որով կաթողիկոսը պետք է հոգար տպարանի կառուցման ծախսերը: Կարճ ժամանակ անց Մայր Աթոռի տարածքում սկսվում են կառուցման աշխատանքները: Ծենքը հիմնելուն գուզընթաց ստեղծվում է նաև գրառուլարան, որը կարևոր էր տպարանի գործունեության համար: Աշխատանքներին մասնակցում են տեղի բնակիչները և հոգևորականները: Հատկապես աչքի են ընկնում ոսկերիչ Հարություն եպիսկոպոսը և Սկրտիչ արք. Շռռոթեցին, ում մասին Ս. Երևանցին իր «Տօնացոյց»-ի հիշատակարանում գրում է. «Արժանի է յիշման և Շօռօթեցի Սկրտիչ արքեպիսկոպոսն, որ իբրու նախկին հեղինակ եղել գործոյս այտորիկ որքան առ փորագրութիւնն ի պողովատեսայս»¹⁴:

Տպարանի կառուցման վերաբերյալ կարևոր նյութ է պարունակում նաև Սիմեոն Երևանցու «Գիրք աղօթից, որ կոչի Ջրոսարան հոգևոր»¹⁵ աշխատությունը, որը տպագրվել է 1772 թ. հենց իր հիմնած տպարանում: Նրա վերջում կա հիշատակարան, որի մեջ կարդում ենք, թե ովքեր են իրենց մասնակցությունը բերել տպարանի կառուցման և հետագա աշխատանքների ընթացքում. «...Նաւե՛ յիշեսջիք զհոգեծին որդեակն Վեհիս մերոյ զԻսահակ շնորհաշատ վարդապետն զեօղարքունցի, որ աշխատի անձաձիր ի շարադրելն, ի սրբագրելն եւ ի փորձատես լինիլն տառից, բառից, բանից եւ այլոց որպիսութեանցն գործոյս եւ գրեթէ սա՛ կանօնաւորէ յամենայնի գգործս զայս: ... Այլե՛ յիշեցէ՛ք միանգամայն՝ զհարագատ որդիսն եւ զշնորհասուն աշակերտսն Վեհիս մերոյ զՅովսէփ վարդապետն եւ զԵփրեմ սարկաւագն զշարօղսն գրոցս: Նաւե՛ զՍկրտիչ վարդապետն, զՅովհաննէս արեղայն. զՆերսէս սարկաւագն, զյառաջնթաց Վարդանն եւ զայլ պաշտօնեայսն, որք ամենեքեան բաց ի յատուկ պաշտամանց իւրեանց, պաշտօնատարք եղեն սիրահար ըղձիւ եւ այս գոր-

13 Դիւան Դայոց պատմութեան, գիրք Գ, էջ 60Է:

14 Սիմեոն Երևանցի, «Տօնացոյց», Էջմիածին 1774, էջ 562:

15 Սիմեոն Երևանցու հիմնած տպարանում տպագրված առաջին գիրքը կաթողիկոսի «Գիրք աղօթից, որ կոչի Ջրոսարան հոգևոր» փոքրիկ աշխատությունն էր՝ տպագրված 1772 թ.: 1773 թ. տպագրվում է Սիմեոն Երևանցու «Տաղարան»-ը: Սակայն «Տօնացոյց»-ի հիշատակարանում կա վկայություն, որ տպարանում առաջինը փորձել են տպագրել Սաղմոսարանը, ինչը չի ստացվել. «Յորում տպեցաք նախապէս զքանի հատ Սաղմոս, որ զտիասութիւնն շատ ուներ նկատմամբ տպեցմանն»: Տես Սիմեոն Երևանցի, «Տօնացոյց», Էջմիածին 1774, էջ 554:

ծոյս...»¹⁶:

Մայր Աթոռի հոգևորականներից գրաշարութեամբ զբաղվում էին Հովսեփ վարդապետը և Եփրեմ սարկավագը, իսկ Իսահակ Գեղամացին իրականացնում էր տպագրվող նյութերի սրբագրումը և խմբագրումը: Շուտով Իսահակ վարդապետը այնքան է հմտանում տպագրական գործի մեջ, որ ստանձնում է տպարանի տնօրենի պաշտոնը: Կարծիք կա, որ Էջմիածնի տպարանին մեծապես օգնել է նաև տպագրութեան հայտնի մասնագետ Պողոս Արապյանը¹⁷, որը Կ. Պոլսից էր ժամանել Մայր Աթոռ:

Փաստորեն 1771 թ. Ամենայն Հայոց կաթողիկոս Սիմեոն Երևանցուն հաջողվեց ստեղծել տպարան, որը դարձավ առաջինը մայր հողի վրա: Էջմիածնի նորաբաց տպարանը անվանվեց «Սուրբ Գրիգոր Լուսավորիչ»¹⁸: Երկար չարչարանքներից հետո կաթողիկոսը իր նախաձեռնած գործը պատվով հասցրեց ավարտին, «զի յաջողակ լիցի գործն տպագրութեան. գոր և եմոյծ իսկ և հաստատեաց յաջողմամբն Աստուծոյ»¹⁹:

Խոսելով հայրենիքում առաջին տպարանի ստեղծման մասին, հարկ է նշել, թե Սիմեոն Երևանցին ինչպիսի քաղաքական պայմաններում կարողացավ իրականացնել տպարանի ստեղծումը: Պարսկաստանի իշխանության ներքո երկիրը քայքայվել էր, կաթվածահար վիճակում էր գտնվում կրթական գործը: Նման պայմաններում Մայր Աթոռում տպարան հիմնելը կարևոր քայլ էր՝ մաշտոցյան գրերի գյուտից երկար դարեր հետո: Սիմեոն Երևանցին այդ դժվարին պայմաններում կարողացավ անել այն, ինչն ուղղակի անհավանական էր թվում: Հայաստանում պետական իշխանության բացակայության պայմաններում նա հիմնեց տպարան, ինչը Պարսկաստանում և Վրաստանում տեղի ունեցավ ավելի ուշ՝ «... իբրև առաջին մասնով Հայաստանի, Կովկասեան երկրի և պարսից տէրութեան մէջ»²⁰: Իսկ պարսկերեն լեզվով առաջին գիրքը տպագրվել է միայն 1830 թ.: Տպարանի ստեղծումով հայ ժողովուրդը գրագիտության ասպարեզում ավելի առաջավոր դիրքերում հայտնվեց, քան իրեն շրջապատող այն ազգերը, որոնք պետականություն ունեին:

2.Թղթի գործարանի հիմնումը

Տպարանի հիմնադրումից հետո առաջ եկավ տպագրության համար անհրաժեշտ թղթի խնդիրը: Սկզբնական շրջանում թուղթը Հայաստան էր բերվում եվրոպական երկրներից, ինչը բավականին մեծ ծախսերի հետ էր կապված:

16 Սիմեոն Երևանցի, «Գիրք Աղօթից», Եր., 2003, էջ 122-124:

17 Պողոս Արապյանը (1742-1835 թթ.) ստեղծել է թուրքերեն տպատառ գրերը, որոնք իր պատվին կոչվել են «Արապոլու»: Նրա համբավը այնքան մեծ է եղել Օսմանյան կայսրության մեջ, որ Մահմուդ II (1808-1839 թթ.) սուլթանը 1816 թ. հատուկ հրովարտակով Արապյանին նշանակում է արքունի տպարանի տեսուչ: Արապյանը վրաց Գերակ II արքայի հրավերով նաև Վրաստանում է հիմնում տպարան, որի համար վրաց արքան բավականին մեծ գումար է տալիս վերջինիս: Այս տաղանդավոր մարդը հորինել է հայերեն լեզվով նոր տառատեսակներ՝ տպագրության համար և իր կյանքի մեծ մասը նվիրել է հայ տպագրության զարգացմանը:

18 Տպարանի շենքի ճակատային մասում թողնվել է արձանագրություն, որի մեջ նշված են Սիմեոն Երևանցու և Գրիգոր Չափկյանի անունները, ովքեր նախաձեռնեցին տպարանի կառուցումը: Այդ արձանագրությունը այժմ պահվում է Հայաստանի պատմության թանգարանում:

19 Սիմեոն կաթողիկոս Երևանցի, «Ձամբռ», Վաղարշապատ, 1873, էջ 44:

20 Ա. Երիցեան, Պատմական տեսութուն հայ տպագրութեան մինչև տասնեվեցերորդ դարը, «Փորձ» անսագիր, Թիֆլիս, 1881, N 4, էջ 25:

Ուստի Միմեոն Երևանցին որոշում է տեղում կառուցել թղթի գործարան: Դրա համար Հայաստանում կային բավականին լավ պայմաններ: Ինչպես Գյուտ քահանա Աղանյանցն է գրում՝ «...թղթաշինության անհրաժեշտ երկու գլխաւոր պայմանները՝ բամբակի ու ջրի առատութիւնը, որոնցով օժտուած է Արարատեան դաշտը, մեծ յաջողութիւն էին խոստանում»²¹: Բայց թղթի պատրաստման համար հայրենիքում մասնագետներ չկային: Այդ պատճառով կաթողիկոսը արհեստավորներ է հրավիրում Եվրոպայից:

Ժամանած մասնագետները գործարանը կառուցում են վանքի հարավային մասում՝ գեղեցիկ և սրբատաշ քարերով. «...Եւրոպայէ հմուտ արուստագետներ բերել տալով, 1774-ին՝ տաճարին հարաւային կողմը ու անկէ բաւական հեռու՝ մեծ շէնք մը կառուցանելով, հոն գետեղեց թղթաշինութեան համար բերել տուած գործիքները»²²: Թղթի գործարանի հիմնադրման բոլոր ծախսերը ևս հոգացել է Գ. Չաքիկյանը: Այդ ընթացքում տպարանը արդեն բնականոն հունով աշխատում էր, և գնալով տպագրության որակն ավելի էր լավանում: Միմեոն Երևանցին Գ. Չաքիկյանին գրած 1772 թ. կոնդակի մէջ հաստատում է այդ իրողութիւնը. «... Իսկ յայսմ թուովն նոյն Տաղարանն՝ գոր յառաջ տպեալ էաք, այժմ եւս նոյն Աղօթից գիրն քոյ գրովն վերստին տպել ետուք վասն բարոցք փորձառութեան գործարանին: Ահա երկու հատ եւս ի նմանէ եղաք ի մէջ թղթոյս եւ յղեցաք վասն սիրելոյդ, առ ի տեսանել եւ ուրախանալ քեզ այդու եւս, զի ահա տիպն դորին փոքր ինչ լաւագոյն է քան զԱղօթից գրոյ տիպն, որ ահա այդպէս օրըստօրէ լաւապէս հաստատի տպարանն եւ Աստուծոյ...»²³:

Սկզբնական շրջանում Միմեոն Երևանցին թղթի պատրաստման մասնագետներ է հրավիրում Պարսկաստանից, որտեղ գործում էին թղթի գործարաններ, բայց հարևան երկրից ժամանած վարպետները չեն արդարացնում իրենց: Որպեսզի չձգձգվեն աշխատանքները, Միմեոն Երևանցին Գրիգոր Չաքիկյանին խնդրում է օգնել իրեն, իսկ վերջինս, օգտագործելով իր կապերը, կարողանում է գտնել երկու մասնագետների՝ Բեյսունին և Դեսիռոնին, որոնք Ֆրանսիայից ժամանել էին Կ. Պոլիս: Նրանք խոստանում են երկու տարվա ընթացքում կարգավորել տպարանի աշխատանքները և տեղի ուժերով աշակերտներ պատրաստել: Պայմանավորվածության դիմաց Գրիգորը նրանց թանկարժեք նվերներ է տալիս և 14000 ռուբլի: Որպեսզի ֆրանսիացի մասնագետները Հայաստանում լեզվի հետ կապված խնդիրներ չունենան, Գ. Չաքիկյանը նրանց թարգմանիչ է տրամադրում: Բայց կարճ ժամանակ անց Բեյսունը և Դեսիռոնը դժվարություններ են առաջացնում²⁴: Նրանք ցանկանում էին ժամանակից շուտ գումարը վերցնել և հեռանալ. «...արտասահմանից եկած վարպետները

21 Դիւան հայոց պատմութեան, գիրք Գ, էջ 64Բ:

22 Գ. Չաքիկյանի, Պատմութիւն հայկական տպագրութեան սկզբնաւորութենէն մինչեւ առ մեզ, Վենետիկ. 1895, էջ 186:

23 Դիւան հայոց պատմութեան, գիրք Գ, էջ 64Բ:

24 «Վասն թղթաշինութեան գործեացն հաստ և մեծ փայտք պիտոյացան: Եւ յերկրեջս մերում ըստ այնքանութեան փայտք ոչ գտանեցան: Եւ լուաք թէ ի մայրին Բամբակածորու հաստ և մեծ փայտք շատ գոն: Վասն որոյ և սրբ. ծեհն զթղթաշէնսն ընդ մեր միրզային եղեալ յղեաց անդ, զի երթեալ տեսցեն զփայտն, և որոց հաւանեսցին, նշանադրեալ ցուցանիցեն արանցն մերոց, զի հատեալ բերեցին: Որոց աղագաւ առ Բամբակէն Դամդուլին և Մահմատ Աղայն ուրոյն ուրոյն գերիս թուրքս յանձնարարութեան գրեաց վասն թղթաշինացն, զի ի յերթալն նոցա անդ, ի սեր ունիցին զնոսա, և բանից նոցա ձեռնտու լիցին»: Տես Դիւան հայոց պատմութեան, գիրք Ը, էջ 366:

սկզբում մտադրություն են ունեցել փողերն ստանալ ու փախչել...»²⁵: Վարպետները թղթի պատրաստման գործը երկարաձգում են մոտ երկու տարի, ուստի տեսնելով, որ վերջիններս զբաղվում են խաբեբայությամբ, Միմեոն Երևանցին որոշում է պատժել նրանց: Նրա «Յիշատակարան»-ում տեղեկություն կա, որ կաթողիկոսը ժամանակից շուտ գործից ազատ է արձակել վարպետներից մեկին, քանի որ նա չէր կարողանում թղթի գործարանի համար պահանջվող աշխատանքը կատարել²⁶: Ըստ երևույթին, կարելի է կարծել, որ վարպետներից յուրաքանչյուրը ցանկանում էր յուրացնել ողջ գումարը: Որովհետև, երբ Միմեոն Երևանցին աշխատանքից ազատում է կրտսեր վարպետին, մյուսն անմիջապես կաթողիկոսից պահանջում է, որ «... վեց տարվա պայման կապեն և վարձը տան իրեն գործը վերջացնելու համար»²⁷: Այս անգամ կաթողիկոսը խոստանում է գործարանը հունի մեջ դնելուց հետո միայն վճարել գումարը: Վարպետները կրկին բարդություններ են առաջացնում, որոնք հավելյալ ծախսեր էին պահանջում: Միմեոն Երևանցին փորձում է նորից համոզել, բայց պարզվում է, որ նրանք երդվել են իրենց մասնագիտությունը այլոց չտվորեցնել: Կաթողիկոսը փորձում է դիմել ավելի խիստ միջոցների. հրամայում է, որպեսզի ֆալախա²⁸ բերել տան և վարպետներին պատժեն, այնուհետև նետեն սառցարան. «... Միմեոնը բարկացած փարախայ բերել տուեց նոցա պատժելու և սպառնաց նոցա սառցատուն ձգել...»²⁹: Վարպետները խնդրում են վեց ամիս ժամանակ՝ տպարանի աշխատանքները կարգավորելու համար: Միմեոն Երևանցին տալիս է ևս մեկ հնարավորություն: Այս անգամ նրանց վրա հսկիչ է կարգում Իսահակ Գեղամացուն, որի աշխատասիրության շնորհիվ գործարանը շուտով սկսում է կանոնավոր աշխատել: Տպարանի և թղթի գործարանի ստեղծման վերաբերյալ Միմեոն Երևանցին «Պարտավճար» գրքի մեջ ունի մի բանաստեղծություն, որի սկզբնամասում կարդում ենք.

**Նոր թուղթ՝ նոր գիր՝ նոր տպարան
Բանքն և ըս իլոյս աման
Յատուկ պարգևք նորոգական
Իներ դարուս աղքատութեան
Հանք պարծանաց մեզ յայտնեցան³⁰...**

25 **Ճեմարանցի**, Միմեոն կաթողիկոս Երևանցի, «Էջմիածին» ամսագիր, 1947, է-Ը, էջ 60:

26 «Իսկ և ըստ որում ասացաւ, յամսոյս ԺՎ թղթաշէն ֆռանկքն, տակաւին զլաւ իմն թուղթ ոչ հանին, զի և մեք միամտեաք և ուրախանայք: Ուստի՜ ի մեծ տարակրօսանս կալով մեր, ստիպեաք զնոսա միշտ, զի թէ զլաւ թուղթս հանել գիտեն, հանցեն, ապա թէ ոչ, տացեն մեզ ստոյգ իմն պատասխանի: Իսկ փոքր թղթաշէն ֆռանկն որոյ ամունն էր Սուսի Դէյսօր, զոր և Յովաննէս կոչէին. դեռ մինչև ցարդ մեզ ոչ պիտայացաւ: Քանզի գթութաւունն համայն պարագայիւքն մեծ թղթաշէնն որ Սուսի Բէյսօն Յովսէի ևս կոչիւր, շինեցուցեալ ի զլուխ եբեր, ցուցանելով զչափսն, և զձևն, և յօրինելով զամենայն յոյժ հաստատանագոյն: Իսկ փոքր ամենակին բանի իմեք չպիտոյացաւ, զի ասէին թէ՛ սա միայն լաւ թուղթ հանել գիտէ, և յորմէ հետէ եկին աստ, մինչ ցայժմ կայր պարսպ և դատարկ: Իսկ յորժամ թուղթ հանելոյ ժամանակն եկն, յայնժամ, բաց ի յո՛չ հանելոյն զլաւ թուղթ, սկսաւ ևս մեծաւ զժտութեամբ վարիլ առ ընկերն՝ և առ թարջիմանն իւրեանց, որ և եղ ի մտի զնալ յերկիրն իւր, և ոչ ետ հանգստութիւն ընկերացն, տաղտկացուցանելով և զլսելիս սրբ. վեհին ի ձեռն նոցին, թէ թէ գնա յղեա յերկիրն իմ...»: Տես Դիւան հայոց պատմութեան, գիրք Ը, էջ 526:

27 Կրտսակ եպս. Սմբատեանց, Սուրբ Էջմիածնի միաբանության գրական-կրթական գործունեությունը եւ Մայր Աթոռի տպարանը, «Էջմիածին» ամսագիր, 1972, է, էջ 37:

28 Ֆալախան պատժի յուրահատուկ ձև է, որը հնում կիրառվել է վարձարաններում և ուսումնարաններում: Պատժվողի ոտքերը մտցնում էին այդ սարքի մեջ և պտտելով բարձրացնում վեր, այնուհետև դալար ճիպոտներով սկսում էին հարվածել ոտքերի տակ, որը բավականին ցավոտ էր:

29 Դիւան հայոց պատմութեան, գիրք Գ, էջ 64Դ:

30 **Միմեոն Երևանցի**, Գիրք որ կոչի Պարտավճար, Էջմիածին, 1783, էջ 374:

Գյուտ քահանա Աղանյանցը նշում է, որ Միմեոն Երևանցին Էջմիածնում արտադրված թղթով շտապում է տպել իր «Գիրք, որ կոչի Պարտավճար» աշխատությունը³¹ և այն ուղարկում է Գ. Չաքիկյանին՝ միաժամանակ հայտնելով, որ գործարանի կառուցման համար ծախսվել է 7.800 թուման: Գրիգոր աղան ուղարկում է ողջ գումարը և իր շնորհակալությունը հայտնելով կաթողիկոսին՝ միաժամանակ նվիրաբերում է նրան 400 գույգ հախճապակե ընկանակներ³² վրան ոսկե տառերով գրված. «Ի վայելումն Տեսոն Միմեոնի սրբազան կաթողիկոսին ամենայն Հայոց: Ի ՌՄԻՉ թուին»³³:

Միմեոն Երևանցին առանձին նամակով հնդկահայ բարերարին հայտնում է թղթի գործարանի վարպետների խաբեության մասին: Նա Գ. Չաքիկյանին է ուղարկում նաև գործարանում պատրաստված թղթից չորս օրինակ. «Երկուսը առաջին անգամ հանած փոքր տեսակից և երկուսը յետոյ հանած մեծ տեսակից»³⁴:

Էջմիածնում պատրաստված թղթի վրա կային հետևյալ նշանները. մի կողմում գրված էր «Էջմիածին» և «Ս.Կ.», որը նշանակում էր Միմեոն կաթողիկոս, իսկ հակառակ կողմում՝ «թ. ՌՄԻԵ» և «Գ.Մ.», այսինքն՝ գործարանի հիմնադրման տարեթիվը և գործարանի կառուցմանը նյութական օգնություն ցուցաբերած Գ. Չաքիկյանի անվան և ազգանվան սկզբնատառերը:

3. Թղթի գործարանի և տպարանի հետագա ճակատագիրը

Էջմիածնի տպարանը և թղթի գործարանը Միմեոն Երևանցու կաթողիկոսության տարիներին կանոնավոր կերպով աշխատել են: Գործարանը ավերվում

31 Ըստ Գյուտ Աղանյանցի. «Նոր շինած թղթով կաթողիկոսը շտապեց տպել իր «Պարտավճար» աշխատութիւնը, որի տպած օրինական ուղարկելով Գրիգոր աղային...»: Տես Դիւան հայոց պատմութեան, գիրք Գ, էջ 64Ե: Հայտնի է, որ «Պարտավճարը» տպագրվել է 1779-1783 թթ.: Գիշտ է, Ս. Երևանցին իր կենդանութեան օրոք նախաձեռնեց գրքի տպագրութիւնը, բայց 1780 թ. մահացավ և չհասցրեց ավարտին հասցնել այն: «Պարտավճար»-ի տպագրութեան աշխատանքները սկսում են միայն 1779 թ., այն վերջնականապէս տպագրվում է Ղուկաս Ա Կարնեցի կաթողիկոսի օրոք՝ 1783 թ.: Այս մասին է վկայում նաև «Պարտավճար»-ի վերջում գետեղված հիշատակարանը. «Որ և ո՛չ կարացել տանիլ դառնակսկիօ աղտիցն, և մանաւանդ՝ ըզբարեխնամ տեսուչե վերին կոչողին օրհասն մահու ևս ժամանել առ բարուք ծերին, անկաւ ի ցաւագին հիւանդութիւ. ...Եւ իբրև ետես զինքն մերջել ի հրաւիրումն մեծի Կոչնատեառն, թէպտ կասեցաւ յիւրոյն տեճմանէ զոր ունէր առ տեսուի կատարման տպեցման գրոցս, սակայն ըզ կատարելուեն իւրում ևս հոգացել յաղագս այսորիկ, պատվիրոաց հոգեծին որդուց և աշակերտաց իւրոյ, զկենի վախճանի իւրոյ զմնացորդն գրոցս տպեցուցանել...»: Տես Միմեոն Երևանցի, Գիրք որ կոչի Պարտավճար, էջմիածին, 1779-1783 թ., էջ 378-379: Թերևս հայտնի չէ, թե Գյուտ Աղանեանցը ինչ աղբյուրից է օգտվել, սակայն վերը նշված հարցի շուրջ ոչ ոք չի ակնարկել, բացի Արտակ եպիսկոպոս Սմբատյանցից, որն էլ ամենայն հավանականութեամբ իր «Սուրբ Էջմիածնի միաբանութեան գրական-կրթական գործունեությունը և Մայր Աթոռի տպարանը» աշխատանքը գրելիս օգտվել է Գյուտ Աղանյանցից: Տես «Էջմիածին» ամսագիր, է, 1972 թ., էջ 41: Գ. Աղանյանցը ասում է, որ Երևանցին «Պարտավճար»-ը Գրիգոր Չաքիկյանին է ուղարկել 1777 թ.: Ուրեմն կարելի է ենթադրել, որ Գիրքը արդեն 1777 թ. տպագրված էր: Հարց է առաջանում. ինչու՞ չի շարունակվել «Պարտավճար»-ի հետագա տպագրությունը, եթե արդեն մեկ օրինակ տպագրվել էր: Գիտակցելով «Պարտավճար»-ի կարևորությունը կաթողիկոսարարի դեմ պայքարի առումով, տրամաբանական կլիներ շարունակել տպագրությունը: Սակայն այդ մասին մեզ ոչինչ չհաջողվեց գտնել:

32 Գ. Աղանեանցը նշում է, որ այս նվերները ուղարկելուց մի քանի օր հետո մահանում է Գրիգոր Միքայելյանը (Չաքիկյանը) և դրանք չնախատեսված պատճառներով շատ ուշ են հասնում Մայր Աթոռ և մինչև տեղ կհասնեին, մահանում է նաև Միմեոն Երևանցին: Ճանապարհին ընթանակները կտրվում են և միայն չորս ընթանակ է հասնում Էջմիածին:

33 Դիւան հայոց պատմութեան, գիրք Գ, էջ 64Ե:

34 Նույն տեղում:

է արդեն Ղուկաս Ա Կարնեցու (1780-1799 թթ.) օրոք: Պատճառ հանդիսացան XVIII դարի վերջին Արարատյան դաշտում հաճախակի ընթացող պատերազմները: Եվ քանի որ գործարանը գտնվում էր Մայր Աթոռի հիմնական պարիսպներից դուրս, այն ենթարկվեց ավերածությունների: Այս կապակցությամբ Հ. Շահխաթունյանը նշում է. «... այլ զկնի վախճանի նորա՝ ի պատճառս յարուցման պատերազմաց ի գանազան նահանգակալ իշխողաց ի վերայնի մեանց ի դաշտի աստ Արարատեան՝ շուրջ գայտու պատրիարզական Աթոռով, իսանգարեացն մեծ մասամբ՝ և գլխովին իսկ գործարանն թրթաշինութեան. զի զոլով արտաքոյ պարսպին, երկաթեայ և պղնձեայ գործիք նորա յափշտակեալ ի գորաց ասպատակողացն՝ ցան և ցիր եղեն ի հեռավոր տեղիս: Մինչև զի և զձուլեալ տառն տպարանին ի հեռավոր քաղաքաց գնեալ ի գերչացն հայագի անձիք՝ վերադաճուցանէին յԱթոռ այսր զկնի այնպիսի պատերազմաց...»³⁵ :

Թրթի գործարանի ավերման ստույգ թվականը հայտնի չէ: Կաթողիկոսների այդ շրջանի գրագրությունների ուսումնասիրությունից պարզվում է, որ Ղուկաս Կարնեցու օրոք տպարանն արդեն ավերված էր: Ուստի 1784 թ. Կ. Պոլսի նվիրակ Իսահակ վարդապետը Ղուկաս կաթողիկոսին ուղղված իր նամակներից մեկում ցանկություն էր հայտնել որպես նվիրակ գումար հավաքել և այն օգտագործել գործարանի վերակառուցման համար: Երկրում տիրող դժնդակ պայմաններից ելնելով՝ Ղուկաս Կարնեցին պատասխան նամակում նշում էր. «...այլ ժամանակս ձեռնտու չէ, մանաւանդ խղճալի Նիկողայոսն և վախճանվեցաւ և նոյն արհեստին այլ զիտօղ ոչ գոյ, վասն որոյ թէ հետեւիլ ևս ջանասցոյք, անօգուտ լինի»³⁶ :

Հակառակ թրթի գործարանի ավերմանը՝ 1771 թ. հիմնադրված տպարանը, ո՛չ անշուշտ 1772-1780 թթ. ծավալներով, բայց շարունակում էր իր գործունեությունը. «... Իսկ տպագրատունն թեպէտ և անկաւ յառաջին վայելչուցեն իրոց, այլ այնու ամենայնի խնամօք պահպանեալ՝ տակաւին ևս ի լոյս ընծայէ զկարի կարևոր մատեանս եկեղեցական՝ և գայս»³⁷ :

Էջմիածնի տպարանը կարճ ընդմիջումներով գործել է մինչև 1919 թ.³⁸: Խորհրդային Միության տարիներին այն վերանորոգվել է Վազգեն Ա Պալճյան կաթողիկոսի (1955-1994 թթ.) նախաձեռնությամբ՝ 1961 թվականին, ինչի մասին վեհափառը ակնարկում էր Հայաստանում առաջին տպարանի հաստատման 200-ամյակին նվիրված իր կոնդակում³⁹:

35 **Յովհաննու Շահխաթունյանցի** Ստորագրութիւն կաթուղիկէ Էջմիածնի և հինգ գավառացն Արարատայ, հատոր առաջին, Էջմիածին, 1842, էջ 100:

36 Դիվան հայոց պատմութեան, Նոր շարք, աշխատասիրությամբ Վ.Ո. Գրիգորյանի, հ. Ա, եր., 1984, էջ 417:

37 **Յովհաննու Շահխաթունյանցի** Ստորագրութիւն կաթուղիկէ Էջմիածնի և հինգ գավառացն Արարատայ, հատոր առաջին, Էջմիածին, 1842, էջ 100:

38 Ա. Երևանցու հիմնադրած տպարանի հետագա գործունեության վերաբերյալ ուսումնասիրություններ է կատարել Շ. Շահնագարյանը: Մանրամասները տես Նոր նյութեր Հայաստանի առաջին տպարանի պատմության վերաբերյալ, «Պատմաբանասիրական հանդես», N 1, 1963, էջ 262-266: Տես նաև Էջեր Հայաստանի առաջին տպարանի պատմությունից, «Էջմիածին» ամսագիր, ժԲ, 1972թ, էջ 66-72:

39 «... Հայ ժողովրդի հոգևոր լուսաւորութեան և ազգային-մշակութային զարթօնքի ճանապարհին, 1771 թուականը մի կարևոր հանգրուան է հանդիսանում, երբ լուսաբնակ Սիմեոն կաթողիկոս Երևանցու օրոք, ս. Էջմիածնում հիմնադրում է հայատառ տպարան, առաջինը հայոց աշխարհի ամբողջ տարածքի վրայ: Տպարան, որ սկսել է գործել 1772-ին, իր կողքին ունենալով նաև թրթի գործարան: ...Սուրբ Էջմիածնի տպարանը տարիներ շարունակ առանց ընդհատումի գործել է մինչև 1919 թուականը, լոյս ընծայելով բազում օգտակար կրօնական, եկեղեցական, եկեղեցական պատմութեան

Տպագրության կարևորությունը նախ և առաջ կայանում էր ազգապահպանման խնդրի մեջ: Այն նաև գրագիտության լայն տարածման միջոց էր, ինչը նպաստեց ազգային ինքնաճանաչողությանը և օգնեց այլազգային հոսանքների դեմ մղվող պայքարին՝ տարածելով հայ հոգևորականների գրչին պատկանող դավանաբանական աշխատություններ: Նյութական ծանր պայմաններում տպարանը հանդես եկավ նաև որպես արդյունաբերական միջոց՝ հօգուտ Մայր Աթոռի, քանզի տպագրված գրքերի վաճառքը շահույթ էր բերում եկեղեցուն:

Սիմեոն Երևանցին իր ժամանակի ուսյալ առաջնորդներից մեկն էր և քաջ գիտակցում էր, թե հայ ժողովրդի համար ստեղծված դժարին պայմաններում ինչպիսի մեծ դեր կարող է ունենալ տպարանը: Նա դարձավ առաջին անձը, ով նախաձեռնեց Հայաստանում տպարան հիմնելու գործը և այն պատվով հասցրեց իր ավարտին՝ դառնալով «հայաստանյան տպագրության նախահայրը»⁴⁰:

Summary

THE ESTABLISHMENT OF THE FIRST PRINTING HOUSE AND PAPER FACTORY IN ARMENIA

On the Occasion of the 500th Anniversary of Armenian Printing

Sasun M. Haroutyunyan

One of the most important developments in human history has been the invention of the printing press. It gave birth to revolutionary changes in world civilization. Many nations urgently wanted to make use of this invention in order to develop their science and culture.

The modern art of printing was also acquired by the Armenian nation. The first Armenian publishing house was founded in 1771 by the All-Armenian Catholicos, Simeon A. Yerevantsi. The funding for the construction was provided by Grigor Chakikyan a benefactor from the Indian-Armenian Diaspora.

After the foundation of the printing house the problem of paper arose. At first it was imported to Armenia from European countries, which proved to be very expensive. In order to limit the expenses, Simeon A Yerevantsi seized the opportunity to start paper production in Armenia. By 1776, the construction of a paper factory in Echmiadzin was completed.

Thus, the foundations of both the first printing house and paper factory in Armenia are closely affiliated with Simeon A. Yerevantsi.

ու արուեստի, պատմա-բանասիրական, ազգային հայրենասիրական և գեղարուեստական գործեր...: Տիրոջ ողորմութեամբ, Մեր օրոջ Մայր Աթոռի տպարանը վերաբացուեց 1961 թուականին, ամբողջապես նոր մեքենաներով և սարքավորումներով առատատուր լումաներովը Միացյալ Նահանգաց մեր հաւատացեալ զաւակների, տպարան, որ գործում է նոյն ոգով և նոյն արդիւնաւետութեամբ, ինչպէս այն հիմնուել էր մեզանից երկու հարիւր տարիներ առաջ, տեսիլքովը և տքնութեամբը մի մեծ ու շինարար Գայրապետի»: Տե՛ս «Ամենայն հայոց վեհափառ հայրապետի կոնդակը Մայր Աթոռի Տպարանի հիմնադրության երկուհարյուրամյակի առթիվ», «Էջմիածին» ամսագիր, N ԺԲ, 1972, էջ 3-5: 40 Ա. Գառնիկյան, Սիմեոն Երևանցի, «Էջմիածին» ամսագիր, N ԺԲ, 1972, էջ 28: